

Kujiandaa Kuongoza

Na alipokuwa akija simba, au dubu, akamkamata mwana-kondoo wa lile kundi, mimi hutoka nikamfuata, nikampiga, nikampokonya kinywani mwake: na akinirukia, humshika ndevu zake, nikampiga, nikamwua.

1 Samweli 17:34, 35.

Daudi alikuwa akiongezeka katika kumpendeza Mungu na wanadamu. Alikuwa amefundishwa katika njia ya Bwana na sasa aliweka moyo wake kikamilifu zaidi kufanya mapenzi ya Mungu kuliko hapo awali. Alikuwa na mada mpya za kufikiri. Alikuwa katika nyua za mfalme na alikuwa ameona majukumu ya kifalme. Alikuwa amegundua baadhi ya majaribu yaliyoisumbua roho ya Sauli na alikuwa amepenya katika baadhi ya siri katika tabia na shughuli za mfalme wa kwanza wa Israeli. Alikuwa ameona utukufu wa kifalme ukifunikwa na wingu jeusi la huzuni na alijua kwamba nyumba ya Sauli, katika maisha yao binafsi, ilikuwa mbali na furaha. Mambo haya yote yalitumika kuleta mawazo yaliyochanganyika kwake aliyekuwa amepakwa mafuta kuwa mfalme juu ya Israeli. Lakini alipokuwa akitafakari sana na kusumbuliwa na mawazo ya wasiwasi, alikigeukia kinubi chake na kutoa sauti ambazo ziliinua akili yake kwa Muumbaji wa kila kitu chema na mawingu meusi yaliyoonekana kufunika upeo wa macho wa siku za baadaye yalitawanyika.

Mungu alikuwa akimfundisha Daudi masomo ya uaminifu. Kama Musa alivyofunzwa kwa ajili ya kazi yake, ndivyo Bwana alivyokuwa akimwandaa mwana wa Yese kuwa kiongozi wa watu Wake wateule. Katika utunzaji wa makundi yake ya kondoo, alikuwa akipata tathmini ya utunzaji ambao Mchungaji Mkuu anao kwa kondoo wa malisho Yake.

Milima iliyo peke yake na mabonde mabaya ambapo Daudi alizunguka na makundi yake ilikuwa ni mahali pa kujificha kwa wanyama wala nyama. Si mara chache simba kutoka kwenye vichaka vya kando ya Yordani au dubu kutoka kwenye pango lake kati ya milima, walikuja, wakiwa wakali kwa sababu ya njaa, kushambulia makundi ya kondoo. Kulingana na desturi ya wakati wake, Daudi alikuwa amejihami na kombeo lake na fimbo ya mchungaji basi; lakini bado mapema alitoa ushahidi wa nguvu zake na ujasiri katika kulinda vilivyokuwa chini ya ulinzi wake ... Uzoefu wake katika mambo haya ulithibitisha moyo wa Daudi na kukuza ndani yake ujasiri na ustahimilivu na imani.